



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

24. Kalenderwoche – ab 13. Juni 2010

Ohne Audo leefd nischd

Irschendwie komm isch mir manschma vor, wie doof! Guhd, Sie wern jedzde villeischd midm Kobb niggn un sachn, dass isch mir mid vollem Reschd so vorkomm du, weil ischs ehm bin... - okeh, das kenn Sie sachn! Abor wenn Sie das sachn dädn, dann dädn Sie nisch Reschd ham! Nee, so ganz vellisch doof bin isch nisch. Das sachd ooch meine Gudste. Die sachd, isch bin zwahr doof, abor mid eenor erschdaunlischn Fähischkeed, eenfachsde Zusammenhänge zu vorwirrn.

Un nu duds doch zum Beischbiel een absoludn Zusammhang gähm, zwischn Barkbladz un Audos. Wo keen Barkbladz is, da kommd keenor hin. Dord wo Barkblädze sinn - un wenn dazu noch ohne Gebiehr! - dann sinn dord ganze Heerscharn, die hinkomm! Mor brauch doch bloß ma das Gemnidz-Cendor in Rehrsdorf anguggn - dord is immor e frehliches Gewimml! Un dähr Barkbladz is fasd jedn Daach voll! Gebiehrenfrei!

Un in annre Orde, wose de Innenschdadt als Fußgängerzone gemachd ham, odor wose eene Umleitungsschdraße um dähn Ord rum gebaud ham... dord dun de kleen Einzhändlor un Geschäfte abschdärm. Weil de Audos nisch mähr rankomm dun! Das is iborall so! Wennde de Audos vorschreggn dusd, dann kannsde einbaggn mid deem Ladn!

Weil mir eene Audogesellschaft sinn! Ohne Audos leefd nischd.

Da kannsde nu grien sein, wie de willsd, da kannsde geeschn Feinschdaub sein, wie de willsd, da kannsde Umweldschidzor sein, wie de willsd - das is so! Des Mänschn Audo is sei Himmlreich!

Nee, da hammse schon mansche hibsche Kleenschdadt zu eim Geschbensdorord gemachd. Dod! Un ooch eene Gadschdäde ohne Barkbladz kannsde in de Donne globbn! Das is so!

Un nu denk isch, isch bin doof - weil, obwohl das doch nu so is - un alle wissn das - dauornd wird das Geeschndeel gemachd. Seid Jahre! Warum sinn in dor Sidy de Barkblädze nisch ooch gebiehrefrei? Warum wern de Audofahrer in de Einkoofszendors gedriehm? Weschn Geld? Bleedsinn! Das Geld dud doch allemal iebor dähn Umsatz widdor reinkomm. Odor dun de deiren Barkheiser in dor Sidy dähnen geheern, die in de Einkoofszendors nisdn dun? Das däde dann nadiehrlich sähr schlau sein von die!

Un nu hadde ja ooch ma jemand eene Idee fiehr dähn Briehl - nähmlisch - Audos drofflassn off dähn Briehl! Das is de erschde guhde Idee gewähns, seid dor Wende! Un ooch werns dähn Umweltschidzorn widdor nisch gefalln dud... - das däde eene Schangse sein! Fiehr de Belähbung vom Briehl! So du isch denkn - un mir gleichzeitisch vorkomm wie doof. Weil dähn Zusammenhang zwischn Audo un Lähben scheinbar außor mir keenor sähn dud. Guhd, mor kennde nadiehrlich sachn, dass mor de ganze Gesellschaftd umgrembeln muss... guhd, aber solange mor die Gesellschaftd ham, die mor ham... - de Audogesellschaftd - da hängt ehm alles am Barkbladz! Sonsd leefd nischd, weil keenor leefd! Un ob de Audos nu dordhin fahrn odor dahin... - se fahrn!

Eduard Sachsenmeyer